

NO SIN STROLICS

Siôr Diretôr,

mi àn metût tun consei di scuele e o vores chê di fâ jentrâ ancje la nestre biele lenghe fra lis materiis d'insegnament obligatori, ma no sai di ce bande tacâ parceche mi sbilfin. O seguìs cun atenzion dut ce ch'ò faseis, ma però o ài un scrupul che mi baline dentri-viè: o sai ce ch'ò seis e ce ch'ò pensais, ma dulà oleiso rivâ? Mandi.

S. Marini – Glemone

Riguart dal prin pont, chel de scuele, o vin cirût di contentâlu (e, pàrie, âtris di lôr che si cjatin intrigâz come lui) scomencant a meti, par intajade, dos publicazions ch'a son il struc des nestris ideis: un toc a la volte dal libri «Par amôr o par fuarce?» ch'a è, disint cussì, la part teoriche, e un cjapitul a la volte de «Cuintristorie» di Marchet-Placerean, tacant propit de part plui grivie, de invasion taliane. Lui ch'al tegni dûr e che ur disi, a di chêi sioruz che lu tachin in consei, seti talians seti furlans, che la scuele e à di sei propit usance ch'a disin lôr: democratiche e antifassiste. Vadì e à di rispietâ il popul ch'al furnìs la canae e no à di tibiâ i prins principis di une sane pedagogje ametude ancje pai neris, cha dîs ch'al va rispietât il frut e no l'ideologje di chêi ch'a messedin la paste. Senò, che ur al disi clâr e tont, a son fassisc' plui stupiz dal Duce (parceche e àn duc' i difiez cence nissune virtût) e no san nancje il lôr mistîr. Une scuele che no jè insedeade tal ambient a podin fâle dome int ch'a rive cul casco coloniâl, magari conprât a Glemone.

Pe seconde part, se nus cognos e al sa ce ch'ò pensìn, nol vares di sei tant intrigât di capî di ce bande ch'ò smicjn. No là ch'a rivarìn, che no sin strolics. No sin tant granc' di Marx ch'al veve fat i siei progjez par duc' i secui avignî midiant de societât cence classis, nè di Mussolìn e di Hitler, ch'a çavareavin di fâ sù une barache che vares rezût amacul mil agns e nancje come la «Pax americana» di Thompson, ch'a vares vût di durâ un cincen agns. La storie e jè une di chês robis là ch'al dipent ungrum de virtût e de fortune e là ch'al è sinpri alc ch'al fâs saltâ duc' i progjez. E nancje no si sa cuanch'al ven dî parceche chî nond'è orlois. Si sconbat e si tegnisi pronz. Par ce? Par un Friûl miei di chest. E, s'al covente, metint in forsit ancje il dogma de unitât di Garibaldi.

Ch'al cjali mo in Iran, se il pavon, ch'al ere caranpan di doimil e cincen agns nol è lât a finîle te stagnade. Lu varessino scometût zà fa un an?